



24. aggusti 2018

UKA 2018/49

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiupparput:

**Peqquserluuteqartarnerup akiorniarnani suliniutit qanoq nukittorsarneqarsinnaaner at pillugu UKA 2019-mi nassuiaammik innersuussutitalimmik agguaasseqqullugit Naalakkersuisut peqquneqarnissaanik Inatsisartut aalajangiiffigisassaattut siunnersuut. Nassuiaammi aamma allaasereqquneqarput iluaqutissat ajoqutillu aamma aningaasatigut kingunissat inatsisitigullu tunngavissat, arlaannaannulluunniit attuumassuteqanngitsumik Peqquserlutsaaliuisussanik pilersitsisoqassasuuppat taamatullu aamma peqquserlutsaaliuisussat pillugit inatsisiliortoqassasuuppat, peqquserluuteqartarnerup akiorniarnani suliniutinik katersiviusussamik.**

(Inatsisartunut ilaasortaq Steen Lynge, Demokraatit)

#### **Tunngavilersuut**

Assersuutigalugu peqqinnissaq aamma imigassamik aalakoornartortalimmik atuineq eqqartoraangatsigit tamatta isumaqatigiissutigisarpaput qanoq pinaveersaartitsineq pingaaruteqartigisoq. Pinaveersaartitsinermi qularnaarneqartassaaq suliassat ajornartorsiutillu millisarneqarnissaat.

Peqquserluuteqartarneq eqqarsaatigalugu uanga aamma taamatorluinnaq isumaqarpunga. Nassuerutigissavara nunatsinni peqquserluuteqartarneq imatut ajornartorsiutaanngimmat imaluunniit peqquserluuteqartarnermut assigusinnaasut. Peqataanilli takusinnaavara nunarput avammut nunarsuup sinneranut ammaraluttuinnartoq. Nunarsuup sinnerani sumiiffiit ilaanni aamma sulliviit ilaanni peqquserluttarneq imaluunniit peqquserluuteqartarnermut assigusinnaasut ajornartorsiutaapput annertuut.

Taamaattumik isumaqarpunga maannagaaq eqqarsaatigisariaqaleripput periutsimik qanoq ittumik pilersitsinnaanissarpaput sapinngisamik peqquserluuteqartarnerit peqquserluuteqartarnermulluunniit assigusut pinaveersimatinniarlugit.

Demokraatini nuannaarutigarpaput ullumikkut whistleblowerit pillugit aqqissuussinermik Namminersorlutik Oqartussat iluanni peqarmat aamma Inatsisartuni ilaasortat soqutigisaat immikkut ittut nalunaarsorneqartarmata. Aamma matumani ataatsimiinnermi siunnersuutigaarpaput whistlebloweriqarneq pillugu aqqissuussinerup annertusinissaa namminersorlutik oqartussat ingerlatseqatigiiffiini atorneqalersillugu. Kisianni naammappa?

Naagga, Demokraatini isumaqarpugut naammanngitsoq. Isumaqarpugut iliuuseqarnerusariaqartugut. Peqquserlutsaaliuinissamut inatsiseqartariaqartugut isumaqarpugut,



peqquserluttarneq peqquserluttarnermullu assigusunut akiorniarlugit suliniutit sinaakkutillu tamarmik eqiterneqarfigisinnaasaanik.

Tassunga atatillugu Demokraatini isumaqarpugut peqquserluttarneq pillugu suliniutit arlaannaannulluunniit attuumassuteqanngitsumi immikkoortortaqaarfimmi katersorneqartariaqartut, immaqa aamma Namminersorlutik Oqartussani whistleblowerit pillugit aqqissuussinermut atatillugu tigooraavittut atorneqarsinnaasumik. Arlaannaannulluunniit attuumassuteqanngitsoq immikkoortortaqaarfik paasisutissanik suliarinniffissat ingerlatitseqqiffissarlu pisariaqartippaput. Immikkoortortap arlaannaannulluunniit attuumassuteqanngitsup aamma nakkutigisarisinnaavaa qinikkat politikerit sulinerminni inuttut aningaasaqarnerminnik suliaqartannginnissaat. Nakkutilliinermut atatillugu Inatsisartuni ilaasortat aningaasatigut soqutigisaannik nalunaarsuisarneq sakkussatsialaalluarsinnaavoq. Aamma eqqarsaatigineqarsinnaavoq naapertuutissannginnersoq immikkoortortap arlaannaannulluunniit attuumassuteqanngitsup nammineq suliassaminik aallartitsisarnissaa. Tassunga atatillugu pinngitsoorani immikkoortortap pisortat avataani inissisimanissaa pisariaqassaaq.

Immikkoortortamik arlaannaannulluunniit attuumassuteqanngitsumik pilersitsisinnaaneq pillugu Naalakkersuisut § 37 naapertorlugu apeqqutinnut 61/2018-mut akissutiminni ima allapput:

*”Naalakkersuisut oqallisiginikuunngilaat isummerfiginikuunagulu qitiusumik ataatsimoortumik arlaannaannulluunniit attuumassuteqanngitsumik peqquserlutsaaliuisussanik pilersitsisoqarsinnaanersoq. Naalakkersuisulli isumaqarpugut isumassarsiaq tunngaviusumik soqutiginaateqartoq taamaattumillu eqqarsaatigisariaqartoq. Taamatut eqqarsaatigarnerup peqataanik misissorneqarsinnaavoq taamaattumik immikkoortortaqaarfimmik pilersitsinissaq inatsisitigut tunngavissaqarnersoq aamma inatsisitigut tunngavissaq taamaattoq pissarsiarineqarsinnaanersoq. Taamatuttaaq aamma nukiit atugassat pillugit apeqqut oqallisineqartariaqarpoq paasiniarneqarlunilu.*

Uanniilli § 37 naapertorlugu apeqqutinnut normu 2018-141-mut akissumminni Naalakkersuisut isumassarsiamut taama ilassinilluartiginngillat. Tassani akissummi takuneqarsinnaavoq Naalakkersuisut peqquserlutsaaliuisussamik immikkoortortamik pilersitsinissaq illersortorsuunngikkaat.<sup>1</sup>

Demokraatini isumaqarpugut pingaaruteqartoq peqquserluttoqarsinnaanera peqquserlunnermulluunniit assigusumik pisoqarsinnaanera pimooruttariaqaripput taamaattumik siunnersuutigaarput, Naalakkersuisut - ajornanngippat T4ransperence Greenland - suleqatigalugu innersuussutitalimmik nassuiaasiussasut, qanoq iliorluta peqquserluteqartarnermut akiuineq nukittorsarsinnaaneripput. Tassunga ilanngullugu missorneqakuttoorsinnaapput peqquserlutsaaliuisussanik pilersitsinerup aamma peqquserlutsaaliuineq pillugu inatsisiliornerup iluaqutissartai ajoqutaalu.

<sup>1</sup> [http://inatsisartut.gl/documents/para3637/2018/svar/141\\_2018\\_antikorruption\\_STEEN\\_svar.pdf](http://inatsisartut.gl/documents/para3637/2018/svar/141_2018_antikorruption_STEEN_svar.pdf)



Naalakkersuisut partiillu allat saqqummiussassaannut qilanaarpunga.

**Aningaasarsiornikkut allaffissornikkullu pisortanut kingunissai.**

Nassuiaasiorneq aningaasartuutitaqassaaq. § 37 naapertorlugu apeqqutinni 2018-141-mi takuneqrasinnaasutut siunnersuutip kinguneranik danskit oqartussaaffii paaseqatigineqassappat oqaloqatigineqarlutilluunniit, peqquserluuteqartarnerup akiorniarnernani piginnaasat ilaat suli tiguneqarnikuunngimmata. Tassunga atatillugu oqaatigineqarpoq "sulianik Pinerluttulerinermut inatsimmi aalajangersakkanut ilaasunik suliaqarneq isumagineqartussaammat politiinit naggataatigullu eqqartuussivinnit ...(aamma)... inatsisunik atortitsineq tassaasoq naalagaaffiup akisussaaffia".

Tamatuma saniatigut nassuaasiornermut atatillugu pisariaqartussaassaaq immikkoortumi inatsisitigut inissisimanerup misissorneqarnissaa peqquserluuteqarnermut akiorniarnernata nukittorsarnissaanut innersuussuteqarnissaaq sioqqullugu.

Siunnersuutilli aningaasartuutitaanut tigussaasunut apeqqutaavoq, suliaq Naalakkersuisut qanoq qanorlu periuseqarlutik ingerlanniarneraat. Uangali isumaqarpunga, nassuiaat ilinniagartuup ataatsip ukiup ataatsip iluani suliarisinnaassagaa (500.000 kroner). Aamma tamatumani tunngavigaakka Inatsisartuni siusinnerusukkut suliarisarsimasatta nassuiaatit qanoq akeqartarsimani.

**Aningaasarsiornikkut allaffissornikkullu namminersorlutik inuutissarsiutunut kingunissai.**

Soqanngilaq

**Aningaasatigut allaffissornikkullu innuttaasunut kingunissai.**

Soqanngilaq.